

Violencia domestico ta ser relaciona ku contagio ku HIV/Aids

WOMEN'S Club of Aruba, ta join den e esfuerzo di Fundacion pa Hende Muhe den Dificultad den e luna cu ta enfoca contra violencia domestico y a la vez ta haya importante pa trece e informacion aki dilanti relaciona ku e dia mundial di AIDS, dia prome di december. Violencia domestico ta contribui na e contagio di HIV/Aids y di malesanan sexualmente transmiti den diferente forma. Falta di poder den e hende muher pa negocia den e relacion; e dependencia economico di su partner y miedo pa rechazo ta afecta e habilidad di hende muhe pa proteha nan salud sexual. E raiz di e problema aki ta, te ainda, e dominio di e partner masculino den e

relacion cu ta crea e escenario pa tur e factornan cu, directa of indirectamente, ta contribui na e contagio di HIV/Aids.

Hopi biaha ta dificil pa nos hende muhernan insisti riba fidelidad, demanda pa nan partner uza proteccion of nenga di tin relacion cu nan partner, hasta ora cu nan tin e sospecho of nan sa cu e ta contagia cu un malesa. Hopi biaha nan no por mantene nan mes economicamente pa nan por sali di un relacion caminda nan tin hopi chens di wordo infecta ku HIV. E miedo cu posiblemente nan por wordo maltrata fisicamente of rechaza door di nan partner, ta haci cu un hende muhe lo no puntra nan pareha pa uza proteccion den relacion of cues-

tiona nan fidelidad.

E mes un motibonan aki por ta e causa pa e hende muhe di no busca ayudo ora e ta sospecha cu e ta infecta. Un survey na Merca entre dunadornan di cuida medico 24% a reporta di tin a lo menos un pacient femenino cu a experencia maltrato fisico ora nan a bisa nan partner cu nan ta infecta cu HIV. Mas tanto, hopi biaha nan ta haya sa manera esun prome den e familia cu nan ta infecta, door cu por ehempel nan ta wordo getest ora nan ta na estado of ora cu nan baby bira malo. Door di esey hopi biaha nan ta ser culpa di ta esun cu a trece e malesa den cas.

Den area di Caribe, caminda mitar di e poblacion viviendo

ku HIV/Aids ta hende muher, un cantidad creciente di na tin cu enfrenta e stigma, discriminacion y violencia di e otro sexo relaciona cu e contagio. UNAIDS ta raporta cu den area di Caribe, e porcentahe di hende muher ku HIV/Aids compara cu e total a subi di un 30% na 1999 pa un 62% awor.

Santo Domingo y Haiti, tin un di e mayor porcentahe di HIV/Aids den nos region, segun UNAIDS. Di e 60.000 personana infecta na Santo Domingo, 51% ta hende muhe y na Haiti tin 120,000 persona infecta di cual 60% ta hende muhe. Segun Mirna Flores Cian, hefe di e organizacion no-gubernamental na Santo Domingo Profamilia,

hende muhe, door di factornan fisiologico, tin mas riesgo di wordo infecta ora nan tin relacion sexual sin uza proteccion. E feminisacion di AIDS ta debi na discriminacion social, falta di igualdad den hende muher y hende homber y falta di poder di e hende muher pa negocia den e relacion sexual. Investigacion adicional na Santo Domingo ta trece dilanti cu hende muhernan cu a ser maltrata sexualmente tin cuater biaha mas riesgo di wordo infecta cu un malesa sexualmente transmiti.

Bo por conclui di esaki cu si bo kibra e silencio rond di violencia sexual y HIV/Aids bo por yuda combati violencia contra hende muher